



Daifim


An Official Organ of YMA, Khuangpuilam Branch.

YMA MOTTO



Hunawl hman that
Zofate hmasawwna ngaihtuah
Kristian nundan tha ngaihsan

Khawchin : Source - Accuweather.com



Ruah leh thli thawk mai thei.
Temp - Max: 30°C Min: 22°C
Dar 4:35-ah ni a chhuak ang a,
Tlai Dar 5:56-ah a tla leh ang.

Vol - VI Issue No. - 17

- Tomir Thla -

17th May, 2020 (Pathianni)

Tunkar chang vawn : Sam 85:6-7

"Nangmahah chuan i mite an hlim theih nân"Min tihah leh dâwn lâwm ni?"Aw Lalpa, i ngilneihna chu min hmuhthir la,"I chhandamna chu min pe bawh ang che."

**Khuangpuilam Village Task Force-
Tanpuina dawnte leh hmanna te**

Tanpuina thilpek petute (chhunzawmna):

- 109. Pu GS Zaithantluanga, ₹ 2,000/-
- 110. Pi F. Lalvulmawii, ₹ 1,000/-
- 111. Pi Lalsangpuii, ₹ 1,000/-
- 112. CM Relief fund, ₹ 25,000/-
- 113. Pu Ramzarliana, ₹ 500/-
- 114. Pu Thanglura (Zorun), ₹ 500/-
- 115. NI. Zothansangi (MJS), ₹ 2,000/-
- 116. Tv. Kenny Lalmuankima, ₹ 1,000/-
- 117. Apex bank, ₹ 3,000/-
- 118. Pi Kiamlovi, ₹ 2,000/-
- 119. Pu C. Thazuala (RO Soil), ₹ 500/-
- 120. Pu H. Kama, ₹ 500/-
- 121. Pu Lalthansanga Hrahse, ₹ 500/-
- 122. Pi Zoremawii, ₹ 500/-
- 123. MNF Vengthar, ₹ 3,000/-
- 124. Pu Lalhluna, ₹ 1,000/-
- 125. Dy.CM (UD & PA kaltlangin) ₹ 15,000/-
- 126. Dil sahna hlawn, ₹ 6,290/-
- 127. Pu PC Pakunga (Salem veng) ₹ 2,000/-
- Sum hmuh zawng zawng - ₹ 1,74,221/-
- Hmanral zawng zawng - ₹ 1,26,123/-
- Tuna la neih zat - ₹ 48,098/-

Sum hmanna tlangpuite :

- 1. Duty - zing, chhun leh zan ei tur siamna
- 2. Duty tui in tur mineral water lei nan
- 3. Duty badge siamna
- 4. Permit bu siamna
- 5. Syntax leina
- 6. Bungraw phur driver-te ei leh in tur
- 7. Buhfai sem tur lei nan (Inralrinna tur dah a la ni bawh)
- 8. Petrol lei nan
- 9. Cash book leh file lei nan
- 10. Street light lei nan
- 11. Chungkaw 10 hnenah ₹ 1,000/- theuh
- 12. TNT leh ASCH ah dal bag 1 ve ve

(Thilpetute zawng zawng chungah lawmthu an sawi a; tihhmaih awm palh theiah hriatthiamna kan ngen nghal e.)

Kan dinhmun hian engnge min thlenpui zel dawn a hriat loh a. Chuvangin mitinte, kan khawsak rel i fimkhurin, mamawh tihhniam pawh a hun ta hle.

Chief Secretary hovin COVID-19 Task group hrang hrang thukhawm

Dated Khuangpuilam, the 17th May, 2020 (Pathianni) :

Tomir thla ni 15, 2020 (Zirtawpni) khan Chief Secretary Pu Lalnunmawia Chuaungo hovin Secretariat Conference hall-ah COVID-19 puala Task Group hrang hrang sawrkarin a din te an thukhawm a, inkharkhip thawhlina (Lockdown 4.0) May ni 18, 2020 atanga May ni 31, 2020 thlenga neih tura inkaihhruai dan tur bakah thil pawimawh dang chi hrang hrang an sawiho a ni.

Thil pawimawh chi hrang hrang an sawi zingah hian PMGKY hnuaia Insurance-in a cover zingah frontline a thawk COVID-19 natna veite direct contact nilo te insurance-in a huam ve theih dan tur ngaihtuah nise tih a ni a. Police, VLTF/LLTF leh volunteers te bakah Hospital leh Quarantine Centre hrang hranga bawhlhlawn la khawmtute leh paihtute bakah a phurtute pawh teltir dan ruahman ni se an ti a. Heng bakah hian sawrkarin hnathawk tura a chhaw ten an hnathawhna hmuna an duty laia COVID-19 an lo kai palh a nih a insurance cover tir dan tur ruahman tha an ti bawh a. Hemi lo bawhzui tur hian 'Task Group on Insurance' chu din a ni.

Rapid Antibody Test chungchang pawh sawilan niin tangkhang Mizorama lo haw te chu hmun hla tak tak atanga lo haw an nih avangin screening point-ah rei tak tak RAT nei tura innghahtir loh dan ruahman ni se an ti a. Tangkhang lo haw tur hi an pun belh zel dawn a a lan avangin screening point a medical duty dah belh a tul a hriat a ni bawh. RAT hi a tira tih bak chu COVID-19 symptoms an neilo a nih chuan tih nawn ngailo tura ngaih a ni a; hei bakah quarantine facility atanga home quarantine tura chhuah phalsakte chu an chhuah hma in RAT tih a tul tih sawilan a ni. Tangkhang lo haw te chu quarantine facility a lut lova home quarantine an duh nghal a nih chuan screening point a RAT non-reactive an nih a ngaih bakah, DC leh an chenna Local/Village Level Task Force te remtihna an lak a ngai thung a ni.

Quarantine facilities bakah tangkhang lo haw te dawnsawwna hmun screening point etc. a duty te tan PPE hak kher a tul lova, sawrkar laipuiin PPE guidelines a siam sa uluk taka zawm a tul thu sawi a ni. Aizawl khawpui chhunga kohhran hrang hrang 51 laiin an hmunhmate Quarantine Facility atan hman an remtih thu tarlan a ni a, tangkhang lo haw tur hmun hrang hrang ami te hruai haw dan tur pawh sawiho a ni a. Hemi ni vek hian Jharkhand a haw tur hnamdang mi 81 chu Mizoram atanga thawn chhuah an nih thu tarlan a ni.

HSLC Pass tharte kan lawmpui e

Mizoram Board of School Education (MBSE) hnuaia HSLC 2020 exam result chhuakah kan veng atanga pass zawng zawngte hnen-ah lawmpuina Daifim kaltlangin Branch YMA chuan lawmpuina a hlan a. A bul tanna rap ve chauh inni tih hria a, hma lam hun atan nasa lehzualla in inbuatsaih kan duhsak che u a. Tin, kan veng chhunga sikul awmte paw'n result tha tak in neih avangin kan lawmpui bawh che u a ni.

Tin, tun tuma hlawhtling zo ve ta lo pawhin a tuna hlawhtlingte hi inla lehpel thei a, hlawhtlinna bul rap tur chauh inni tih hria a a lehpeka hlawhtlinna hmu ve thei ngei tura tan la nasa turin kan fuih bawh che u a ni. 'Hlawhchham hi hlawhtlinna ban rinawm tak a ni,'.

YMA chu tanpui ngaite tanpuitu a ni. - YMA Kumpuan : Zirna uar

Editorial Board :

Editor: Pu Ricky MS Dawngzela
Jt. Editor : Pu Lalsiamkima
Treasurer: Nl. Florence Zoremsangi
Cir.Manager : Tv. Samuel Lalpekhlua
Contact No: 9862501858 / 9612691291
9612761781 / 7005494983

FLS Station - 9612566886

Chawngbawla Section

Leader : Pu F. Lalbiaksanga
96121 55162
Secretary : Tv. R. Lalnuntluanga
82599 60032

Vanapa Section

Leader : Pu Lalchuallova
87300 99599
Secretary : Tv. Lallawmzuala
87875 41803

Khuangchera Section

Leader : Pu Lalramzaau
76408 95924
Secretary : Pu Zachungnunga Hrahse
76299 69989

Editorial.....

Inzir a hun

Kan nun phung, mihring mai pawh nilo thilsiam dang zawng zawngah hian hun latomawm mai nilo hun khirh leh harsa tawk tura duan vek kan ni a. A tuarchhelte dam khawchhuah reina tur khawvel a ni te pawh ti ila kan sawisual tam awm lo ve.

Darwin-a chuan, 'A theiapiang /tuarchhelte dinchanna (Survival of the fittest)' tiin a lo sawi a. Ni e, he khawvel luahtu hmasa ni a rin, ramsa lianpui pui hote pawh kha an ei khawp an hmu h zawh loh avanga rem ni a ngaih a ni a; a thente erawh taksa pianphung te zawk leh in-fit zawk, tuarchhel zawka inthlak danglamin tun hun thleng pawh an awm ni a ngaih a ni.

Kan hun tawm mekah pawh hian dam khawchhuak tura theihtawp kan chhuah a ngai dawn hle mai. Engtin?

- 1) A hmasa berin min beitu natna laka kan inven that a ngai.
- 2) Kan aiawh, keini aia thiam zawkte rorelna hnuaia kan kun thiam a, an hmalakna kan thlawp that a pawimaroh. Ro hran ilo neih ve rengawang leh i thuarwihlohna khan dinhmun a tiderthawng a nia.
- 3) Ei leh in tur a tlem telh telh theih avangin chhungtinte'n kan eitur engemaw chen tharchhuah ve a ngai.
- 4) Kan nunphung thlak danglama, mamawh tih tlem a ngai.
- 5) Puar leh fanna nilo, hlimhlawp thil mai maia inhnangfak loh a tul.
- 6) 'Inlên pawh hnam' nih a hun hrih lo; inlên pawh theih hunah aw!!
- 7) 'A ho ê!' hi a ho reng lo; a hre tam apiangin 'A ho ê!' tih an nei tlem.

Branch YMA Office Bearer

President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoramsangi 9612761781	Financial Secretary Pu Rotlingpuia 9862385193

School Education Department hriattina

School Education Department chuan school hawn theih hun tur leh admission tih theih hun tur chungchangah hetiang hian thuchhuah an siam.

Government leh Private Higher Secondary School zawng zawng ten Covid-19 leng mek avangin tuman class XI Admission la tih rih loh tur a ni. Admission tih theih hun tur chu inhriattir leh a ni ang.

Zirlai nu leh pate pawh School Admission chungchangah hian tumah lo buai rih loh tur a ni a, School hawn theih hun tur leh Admission tih theih hun tur chungchangah hian sorkar thuchhuak lo ngaihchan tur a ni e. Sorkar School, a bikin Primary School leh Middle School-ah admission te hi tihfel vek tawh tura ngaih a ni a. Chhungkaw rokhawlhna avanga a hunlaia tifel hman lo awm theih a nih avangin, naupangten harsatna an neih loh nan enrollment tihsak ngai an awm zauh anih chuan VLTF te rawn chung a lo enfel turin Zirtirtute hriattir an ni.

CYMA hmalakna

11.5.2020 : DC Conference Hall-ah LPG Home Delivery chungchang meeting neih a ni a, Pu Fabian Lalfakawma, Treasurer a tel.

- Secretariat Conference Hall-ah Covid-19 hrileng chungchang meeting neih a ni a, Pu Vanlalruata, President a tel.

- Pu Ramhluna, Chaltlang chuan Covid 19 hrileng laka invenna kawnga duty ten a tul anga an hman atan Search Light lian pakhat CYMA hnenah a hlan.

13.5.2020 : Secretariat Conference Hall-ah Lock Down kalpui mek chungchang leh State pawna tangkhangte Mizorama lo haw tur khung hran dan tur chungchang meeting neih a ni a, Pu Vanlalruata, President a tel.

14.5.2020 : Covid-19 hri leng mek avanga ramri venbuk Central YMA-in a la tlawh chhuah loh Dampa Group YMA, Chhawrpial Group YMA leh Thorang Group YMA huamchhunga duty-te tlawhchhuak turin CYMA OB leh CEC member-te chu hmun 3-ah inthenin an fehchhuak.

- Mizoram Legislative Assembly Conference Hall-ah Covid-19 avanga Lock Down kalpui zel hi a tha tih leh tih loh chungchang leh kalpui zel ni ta se, engtia kalpui nge tha ang tih chungchang meeting neih a ni a. Pu Vanlalruata, President leh Prof. Lalnuntluanga, Gen. Secretary te an tel.

Ve leh lawk aw!!!

- B. Vanlalhruaia

Vawiin chu beisei loh lam daih ka College kalpui thin IPS Officer, Tripura a thawk mek chuan min lo phone ve leh khauh mai. A pawimawh hle a ka ngaih vangin a thu rawn sawi hian ka FB Wall tal hi luah ve leh lawk tehse.

Thianpa @Carrey Marak in min rawn phone chhan chu Mizoram mipuite fimkhur leh zual se min duh vang a ni ber, kei tehlul thusawi hian tu bengrawng mah a luh tak tak dawnlo tih lam a ngaihtuah lova, a khatliam hle tih erawh la chiang ve hle.

Tripura-a Covid-19 vei pungzel hi an buaipui nasat leh an mangan tawhzia sawiin Central Investigation team lam pawhin a chhan an rawn ngaihven naa an puhtak ber chu Bangladesh Muslim sum-dawngte vang a lo ni tih a sawi. Heng Muslim-ho hian Covid-19 hi an pawisa lo hle a, an pathian biak inkhawm pawh an thulh phah chuang lo niin a lang, a ti. Heng ho hian Bangladesh 'Sangha ro' chu demand a tam thin em avangin BSF duty-te thamna pein Tripura-ah an rawn lut a. Chu chu Tripura a Positive tam ber (de-

tect) pawh BSF hlir an nih chhan niin a sawi tlat mai.

Ramria uniform nena duty an nih avangin heng BSF-ho hi lo control ve hi State sorkar tan a harsat si avangin an mamawh leh duhna ah an kalkual zung zung thei si a. Tripura chu kan mangang leh zual hle a ti. Heng Bangladesh atanga rawn luhtum tamtakte hian Mizoram pawh an rawn lut ve reng thei a, BSF duty-te hi an tham theih tlat avangin fimkhur nasa hle rawh u, a theihna ah fimkhurna turin Social media ah sawidarh (☞ Phek 4-na)

(Thu ziaak Huang)

Pipute sakhua leh a vawrtawp

- R. Nelsona

Kan mithiamte meuh pawhin, pi leh pute sakhua an sawi nikhuain, a hmawr bâwkna, a vâwrtâwp, Pialrala faisa ringa awm der der kha an thlakhlelh ber niin an sawi ṭhin a. Chu'ng mite thlah kan nih a vangin, thawk lova neih duh ta zel kan niin an sawi bawk. Faisa ring tura an beihna kawng bumbohzia leh an sakhua in tlawmngaihna a ken nasatzia erawh an chhut tel leh si lo; a khingbai hle. I han bihchiang teh ang.

Pialrala faisa ringa awm theihna hi kawng hnih chauh a awm - In lam leh Ram lama thangchhuah a ni. Ram lama thangchhuah tur chuan, Sai, Tumpang, Sakei, Savawm, Sanghal, Zukchal, Vahluk leh Rulngan. Vahluk leh Rulngan hi thangkima an ti bik ṭhin, a tel lo pawhin thangchhuah an ni tho va; mahse, pawimawhna an nei ve si a ni. Pialral kawngah Thangchhuahpa chu Zukchal chungah a chuang ang a, a ki hreuhah Rulngan a in zem ang a, ni sa laka daihlim turin Vahlukin a thlawh hual reng ang. Tichuan, Pawlan a lo hmuh pawhin a lo hre nghal mai dâwn a ni. A kherhpua sai ngam lovin nuam takin Pialral a lût ang. (Sakei hi sapui an ti a; kah har tak leh kah ngawt zel an duh loh vangin, thangchhuahnaa sa kah ngaia sawi tel lo an awm bawk) Heng sate kap kim tur chuan vanneih a ngai hle a, a eng ber emaw kap thei tlat lo an awm fo reng a ni. Chutiang an kah theih loh chu naupang zawkin kap se, "Kei chuan hun ka la ngah a, thangchhuah nana i kah ni rawh se," tiin aia upate an pe ṭhin. Tichuan, thangchhuahpa a lo ni thei ta a ni. Thilpek hlu a tling a, tlawmngaihna a tilang bawk. Hei hi upa sa kah tih ṭawngkam lo chhuahna a ni.

Thangchhuah nana salu an kim meuh chuan a ngai emaw, sa dang emaw an kap tel ṭeuh hman a. Sa kap ve thei loten an hnung an zui a, a bawp an man a, lal sa chhiah leh saserh bak chu an insem vek ṭhin. An kah tam emaw, sa lian an kah emaw phei chuan, a khuain an phur mai ṭhin a ni. Hah thikula an hawnsa pawh ṭhenawmte an hleh a, an pumbilh ngai lo. Hmeithai leh chhumchhiaten sa an ei ve theihna tur thurûk hi an sakhuaah chuan a lo inzep tlat a nih chu!

Tin, thangchhuah tum vangin, thlawh hma an thlahthlam thei chuang lo; mi ral, sa ralah hma tawng nih a ngaih bawk vangin, mi bakin an hah ṭhin reng a ni.

In lama thangchhuah : *Hei pawh hi a hautak hle. Khuangchawi a ngai a, sa leh khua an biak dan indawta thang an chhuah meuh chuan, Sepâ 5, Sepui 1, Vawkpa 7, Vawkpui 2 leh Kêlchal an talh hman tawh a. Zû ngân 700 vel zet an sêng ral hman tawh. (Zu ngan khat hi*

buhkem leh a vaithlum ṭin khat vel a ni). Buhfai phei chu chhut ngaihna a awm lo, khua a len leh an seng tam ting mai a ni. Khuangchawi niin mipuiin an inchuh atan Sial, Silai, Darkhuang, Darbel leh tangkate an la vawr ta cheu va, mipui ei leh in leh an intihhlina vek a ni. An thil vawr hi Mizo pipute ro tling ṭhah an ni hlawn. (Inchuh chi loh aiah thingfak an vawr ṭhin).

An pialral kalkawngah hian michhe al ei ngai lo ten tlai leh puar eleuhva an ei, an in tur zû leh sa te, michhe faten an neih phak ngai loh ro tling an neih vêna remchângte a inzep tel vek a nih chu!

Mi dangte inhumhimna, mi tana inpekna, insensona, mi aia thawk tam leh hah tura inpekna, Tlawmngaihna sakhua lo zuk ni reng a! Mi neinung leh chungchuangte zar, khawtlangin a zo theihna tur leh khua leh tuite himna tura lang lo lam aṭanga zirtirna thurûk fun sakhua a ni tlat a ni. A hmu chhuaktu fin leh dâwn thuizia hi kan hre ngut na maw?

Inkharkhip Thawh lina (Lockdown 4.0) kalpui leh tur chungchanga Health Minister Dr. R. Lalthangliana'n Mizoram mipuite hnena a thuchah

"Tun hun hi fimkhur ngaih hun lai ber a ni a, zan hnihkhat thil thuah fimkhur loh avanga chhiatna vawrtawp thleng thei reng kan ni"

Zoram mipui zawng zawngte chibai ka buk che u a. Lockdown period thawhthumna chu Pathian hruainain kan hman zo dawn ta a. Sawrkar pawhin uluk takin hmanraw chi hrang hrang nen hma lain, State/District/Local Taskforce te, Kohhran leh mimal angten theitawpin hma kan la ṭeuh a, chumi rah duhawm tak chu Pathian pawhin mal min sawm sakin, ram pawn aṭanga lo lut (imported case) pakhat ZMC-a enkawl chu a lo damchhuak ta a. Hei hi Kohhran leh mimal tinte ṭawngṭaina Pathian min chhanna a ni. Tunah tak hi chuan kan hriat theih chinah Covid-19 hri vei Mizoramah kan awm ta rih lo. India ram hmun hrang hrang aṭang pawhin Mizoram sawrkar leh Task Force hrang hrangte kan inpekna leh thawhhonaah pawh fak kan hlawn ve hle a ni.

Hetih mek lai hian, India leh Mizoram sawrkar pawhin tun hnaia lockdown kan kenkawh chungchangah loh theih loh a ei leh bar lakluh kawngahte a pawilo chinah inthlahdul deuhin thil kan kalpui mek a. Tunah hian kan ram mi leh sate ngei state hrang hrangah hun rei tak tangkhangin an mangang mek a. An ei leh in leh awmna tur thlengin sawrkarin ngaihtuahin ṭan a la mek a. State dangte pawhin an mi leh sa seng luh runpui an kalpui ve mek bawk a ni. Kan sawrkar pawhin Chief Minister zahawm tak Pu Zoramthanga kaihhruaina hnuaiah theitawp chhuahin kan unau tangkhangte lakluh hna ngawrh takin a kalpui mek a. A lo haw turte hi an

zat chiah pawh hriat harsa khawpin mi sing chuang dawn tling tura ngaih an ni.

A tir lama lockdown kan kalpui chhung zawng leh ram pawn aṭanga lo lut an awm loh lai kha chuan kan him tlang vek a. Tunah erawh state dang aṭanga an lo luhna Gate pui hawnsakin, tam tak an rawn haw takah chuan, hri kai tamna hmun thui tak paltlanga rawn haw mekte an nih avang hian, kawng lakah kai palh thil pawh awm thei a ni a. Chuvangin, kawng tinrengah a hma aia nasa taka kan fimkhur tlan zual fe a ngai a, anmahni ngei pawh an invawn fel a ngai tak zet bawk a ni. Sawrkarin dan leh hrai zawm tur a siamte uluk taka kan zawm (☞ Phek 4-na)

Damna kan zawng; mahse, damna chu keimahniah hian a awm.

(Phek 3-na zawmna)

tlán vek loh chuan zan hnih khat thilah fimkhur loh avanga chhíatna vawrtawp thleng thei reng kan ni tih I hre reng ang u.

A huhova Quarantine-te leh loh theih loh avanga mahni in lama Quarantine-te pawh khunghran an nih mek lai hian sawrkar thu chhuakte zawm hram hram turin ka chah duh a. An duhthusam anga tha leh nuama kan enkawl vek theih loh pawhin, “Ram tana ka tih ve theih a ni” ti chungá lungdam taka an lo pawm thiam ka duhin ka ngen tak meuh a ni. An lo chhuah hunah pawh thil thleng palh thei a la awm a ni tih hre chungá thiantha leh chhungkhat lainate intláwh-pawh kawngah fimkhur turin ka ngen bawk a ni.

A nawlpui tam zawk an lo luh fel hnu pawhin chawlhkar hnih dawn chhung chu kan fimkhur zual a la ngai dawn a, chumi hunah chuan kan ram dinhmun a la hriat theih chauh ang. Chumi hnu zelah pawh Covid-19-in kan ram dinhmun a tihdanglam dan tur chin a la hriat loh. Chuvangin, thuneitute hma lakna kan zawm zel a pawimawh a, chutianga kan awm phawt chuan Pathian pawhin mal min sawm ngei ang.

Tuna Mizoram sawrkar leh Private Hospital-te pawh hian Covid-19 dam lo tam zawk enkawl hi chu kan hmanraw neih hrang hrangte thlir hian kan la zuam lo khawp a. ZMC-ah pawh ICU khum 7 kan la nei a ni mai a, damlo pakhat ringawt enkawl pawh a buaithlakin, Doctor leh thawktu dangte enkawl na senso pawh a hautak hle a ni. Covid-19 damlo hi doctor zawng zawngte enkawl theih a nih loh avangin, a enkawltu bik an awm a ngai a, a damdawi tak hi khawvel mithiamten an la hmuchhuak baw si lo a, enkawl a buaithlakin a hautak hle a ni.

Thuawih tak leh fimkhur taka kan tanrual zela, thuneitute thu kan zawm that zel chuan, Pathian pawhin mal min sawmin, Covid-19 hripui hi kan la hneh ngei ang tih hi i ring tlat ang u.

HRIATTIRNA LEH NGENNA

Thahnemngai taka kan thawhhona avangin Lockdown thawh 3-na zet chu tluang takin kan lo zo fel thei ta a. VLFT zawng zawng leh thuawih taka awm mipui chungah lawmthu kan sawi takmeuh ani.

Thawhtanni atang hian Lockdown thawh 4-na a lo intan leh dawn ta. Kan kal zel dan tur hi State Level-in kaihhruaina a la siam lova, reiloteah a rawn siam beisei ila. Hemi zulzui hian kan District chhunga kalpui dan tur Thawhlehi ah sawi fel beisei ani.

Dist Level Task Force-in kal dan tur thar a rawn tih chhuah hma chu tuna kan ‘KALDAN PANGNGAI’ hian la kal chhunzawm leh rih tur a ni a. State Level-in kaihhruaina thar rawn siam mahse District chhung bikah chuan District chhung bika kaldan tur thar siam anih hma chuan mahni thu thua State guideline lo zawma, lo tidanglam nghal mai lovin District pumpui zaikhata kan luan theih nan District Level Task Force thutlukna lo nghah hram hram tur ani e.

*Deputy Commissioner
Kolasib Dist.*

CYCLONE: THLI TLEH CHAK LAM CHUNGCHANGA I HRIAT TUR

Bangladesh tuipuih cyclone a awm mek a, mi tin ngaihven a nih angin cyclone tleh chak lam chungchang hriat zau nan tlem han ziah thain ka hria. Cyclone tleh chak lam awmzia hre tur chuan cyclone zeizia hriat fiah hmasak a ngai a ni.

Cyclone hi thlivir a ni a, khawvel hmar lam khingphelah chuan dingzawngin a tleh vir thin. A hnuaí lamah hian pawn lam atangin chung lamah an tleh vir lut thin a ni. Thli vir lai tak hi a mit (eye) tiin an ko a. A mit lam panin pawn lam atang chuan thli an tleh vir lut a, a mit tak erawh chu an thleng lo a, a mitah chuan thli pawh a na ve ngai lo. A mit bul hnai bawr a mitko (eyewall) hi thli natna lai ber chu a ni a, he lai hmuna thli nat lam hi cyclone tha chak lam sawi nan an hmang ber thin a ni.

Cyclone tha chak lam emaw a tleh nat lam 90 kmph a ni an tih chuan cyclone thlivir huam chhunga a pawn lam hmawrfem atanga a mit lama thli tleh lut te tha chak lam emaw tleh nat lam sawi na a ni a, a mit bul hnai khawimaw laia natna lai berah 90 kmph-a na a ni tihna a ni.

Cyclone chu tleh vir mup mup pahin zawi zawiin boruak panna lai zawhin a tawlh sawn thin a. A mit tawlh sawn chak lam kha ‘cyclone tawlh sawn chak lam’ chu a ni mai. He a tawlh sawn chak lam hi khawmual a thlen hun tur chhut nan hman a ni a, a tawlh sawn chak lam hi a danglam a danglam ve thei a ni.

Mi thenkhat, cyclone zeizia hre loten a tleh nat lam hi khawmual a luh hun tur chhut nan an hmang thin a, a dik lo nasa mai. Cyclone pakhat hi darkar khatah mel 100-a chakin tleh ta se, tleh pahin darkar khatah mel 6 rate-in tawlh sawn zel bawk se. Mel 120-a hla khawmuala a luh hun tur chu darkar 20 hnua h a lut dawn tihna a ni. Tah hian a tawlh sawn chak lam hi khawmual a luh hun tur tlangpui hriat nan hman a ni a. A tha chak lam/a tleh nat lam (wind speed) erawh chu kan hnen a rawn thlen huna kan tawrh tur thli tha chak lam kha a ni thung a ni.

(Thulakna : Khawchin & Science. 16/5/2020)

(Phek 3-na zawmna) tam a tha hle ang tiin kei tehlul hi min rawn hrilh ve nasa bawk a, kan Task Force lama hruaitu Border lama duty thin ka FB friend-te khan TUIKUK LEH CHAKMA ho chang nilo, BSF Duty-te in dawr-naah khan lo fimkhur zual hram turin ka chahve leh chhawng che u a nih hi.

Kei chu kan Veng chhunga Task force thu zawmtha list siam se Top 10 zingah ka la lan phak ka ring e. He hun thim tak mai hi INZIR NAN HMANG VEK THEI ULA, PATHIAN TEL LOVA IN HMACHHAWN LOH HRAM KA BEISEI. SAWISELNA A LO AWM PAWHIN CHHAN LEH VAMG AWM LOVIN TU MAHIN MI KAN SAWISEL NGAILO tih hre chungan rilru lama hriselna nen kan dawngsawng theuh dawn nia.

STAY SAFE, STAY BLESSED. PRAY MORE THAN EVER BEFORE